

# ESTATUTOS

## CAPITULO I

### NORMAS XERAIS



**ARTIGO 1º.-** A Sociedade Deportiva de Cazadores “**SOCIETARIO DE CAZADORES TERRA CHA**” é unha Asociación Privada con personalidade xurídica e capacidade de obrar, integrada por persoas físicas, que ten por obxecto exclusivo o fomento e a práctica deportiva da CAZA e actividades deportivas relacionadas co devandito exercicio, sen ánimo de lucro.

**ARTIGO 2º.-** A Sociedade Deportiva de Cazadores “**SOCIETARIO DE CAZADORES TERRA CHA**” practicará como principal modalidade deportiva a CAZA e afiliarse á Federación Galega de Caza, acolléndose á súa tutela e disciplina. A Federación Galega de Caza elevará estes Estatutos á ratificación do órgano competente da Xunta de Galicia en materia deportiva, solicitando a súa inscrición no Rexistro de Entidades Deportivas, conforme á Lei 3/2012, do Deporte de Galicia.

A Sociedade Deportiva de Cazadores “**SOCIETARIO DE CAZADORES TERRA CHA**” practicará asemade as modalidades deportivas da Federación de Caza, funcionando a este fin as seccións deportivas correspondentes, que se adscribirán ás respectivas Federacións, sen prexuízo de que a Asemblea Xeral poida acorda-la creación de novas seccións.

**ARTIGO 3º.-** O domicilio social da Sociedade Deportiva de Cazadores “**SOCIETARIO DE CAZADORES TERRA CHA**” fíxase na Casa da Cultura de Muimenta, s/n, código postal 27375, teléfono 650686716, concello de Cospeito, provincia de Lugo.

A Xunta Directiva, cando as circunstancias así o aconsellen, poderá decidi-lo cambio de domicilio social dentro da mesma localidade, sendo preceptiva a ratificación posterior da Asemblea Xeral Extraordinaria. Para o traslado do domicilio social a outra localidade, que deberá de ser sempre dentro do territorio da Comunidade Autónoma de Galicia, será necesario o acordo da Asemblea Xeral extraordinaria.

En ámbolos-dous casos, o traslado do domicilio social non implicará a modificación dos Estatutos **pero terá que ser notificado á Federación Galega de Caza e ao Rexistro de Entidades Deportivas.**

A Sociedade Deportiva de Cazadores “**SOCIETARIO DE CAZADORES TERRA CHA**” non conta con instalacións e locais propios.

## CAPITULO II



### CLASES DE SOCIOS, ADMISIÓN E OBRIGACIÓNS

**ARTIGO 4º.-** O número de socios será ilimitado. Nembargantes a Asemblea Xeral poderá suspender a admisión de novos socios cando así o esixan razóns de aforo ou capacidade. Os socios poderán ser das seguintes clases: de número, aspirantes, familiares e honorarios.

**ARTIGO 5º.-** Son socios de Número tódalas persoas maiores de idade, que satisfagan a cota social establecida pola Asemblea Xeral Extraordinaria, e reúnan algún dos seguintes requisitos:

- Ser nativo da zona que abarca o ámbito territorial do Tecor da Sociedade ou familiar directo dos nativos, incluídos xenros e noras.
- Propietarios de terras dentro do perímetro do Tecor da Sociedade.

Os socios nativos ou fillos que perdan toda vinculación,(vivenda, fincas ou residencia), non terán dereito a seguir sendo socios.

Os socios fundadores, son os que crearon inicialmente a Sociedade, e terán dereito a ostentar esta condición indefinidamente, excepto nos casos citados no art. 8.

Os menores de 18 anos, serán clasificados como socios Aspirantes, tendo dereito ao uso das instalacións sociais mediante a cota que determine a Asemblea Xeral Extraordinaria, e pasarán automaticamente a socios de Número ao cumpri-la maioría de idade, sempre e cando reúnan os requisitos establecidos para os socios de número.

Son socios Familiares todas aquelas persoas que dependan economicamente dun socio de Número e convivan con él no mesmo domicilio.

Serán socios Honorarios aquelas persoas ás que a Asemblea Xeral confira esta distinción e contarán cun posto de preferencia nos actos oficiais da Sociedade.

### ARTIGO 6º.-

1. Os socios de Número terán os seguintes dereitos:

- a) Contribuír ao cumprimento dos fins específicos da Sociedade.
- b) Esixir que a Sociedade se axuste ao disposto na Lexislación e Normativa autonómica deportiva, Normas da Federación Galega de Caza, ao establecido no presente Estatuto, e calquera outra Lexislación ou normativa vixente que lle sexa aplicable por razón do seu obxecto social.
- c) Separarse libremente da Sociedade.
- d) Coñecer as actividades da Sociedade e examinala súa documentación, previa petición razoada ó Presidente ou Xunta Directiva.
- e) Expoñer libremente as súas opinións no seo da Sociedade, especialmente nas Asembleas Xerais.
- f) Ser elector e elixible para os órganos de representación e goberno da Sociedade, sempre que teña plena capacidade de obrar e reúna os demais requisitos que se mencionan no Anexo I dos presentes Estatutos.

g) Ser membro da Asemblea, con dereito a voto, sempre que estea en posesión da Licencia Federativa de Caza en vigor, salvo acordo contrario da asemblea xeral.

2. Son obrigacións dos socios de número:

a) Aboa-las cotas que determine a Asemblea Xeral Extraordinaria.

b) Contribuír ao sostemento e difusión do deporte ou modalidades deportivas da Sociedade.

c) Acatar cantas disposicións dicte a Asemblea Xeral, a Xunta Directiva ou o Presidente, para o bo goberno da Sociedade.

3. Os socios Aspirantes terán dereito a disfrutar dos servizos e instalacións sociais da Sociedade que determine a Asemblea Xeral.

4. Os familiares dos socios de Número terán dereito a disfrutar daqueles servizos e instalacións que determine a Asemblea, previo pago da cota fixada pola Asemblea Xeral Extraordinaria.

**ARTIGO 7º.-** Para ser admitido como socio en calquera das súas modalidades é necesario:

1. Te-la idade sinalada para cada unha delas.

2. Solicitud por escrito dirixida ao Presidente.

3. No caso dos socios de Número, reuni-los requisitos sinalados no artigo 5 anterior.

4. Satisface-la cota de ingreso correspondente.

**ARTIGO 8.-** A condición de socio pérdese:

a) Por vontade propia.

b) Por falta de pago das cotas sociais, previo requirimento do pago, e consecuente Resolución da Xunta Directiva.

Todo socio que non teña os pagos o día, estará suspendido dos seus dereitos como tal hasta que pague.

c) Por acordo da Xunta Directiva, ratificado pola Asemblea Xeral, fundado en faltas de carácter grave, ou moi grave, previa audiencia ao interesado, mediante expediente disciplinario tramitado conforme ao disposto na Lei 3/2012 do Deporte de Galicia.

En todo caso o socio que habendo causado baixa sen xustificación algunha ou por impago das cotas e solicitase o seu ingreso, independentemente da cota de entrada deberá abona-lo importe das cotas transcorridas dende o momento de causar baixa, a data da solicitud de reingreso.

O socio excluído por impago de cotas ou que cause baixa voluntaria, perderá tódolos seus dereitos, es as cantidades satisfeitas en razón de cotas ou calquera outra.

d) Por segregar os terreos do Tecor e/ou por perder a condición de socio pola que foron admitidos, conforme ó establecido no artigo nº 5 anterior, previa comunicación ó interesado e conseguinte Resolución da Xunta Directiva, ratificada pola Asemblea Xeral.



## CAPITULO III




### ORGANOS DE REPRESENTACIÓN E GOBERNO

**ARTIGO 9º.-** Son órganos de representación e goberno da Sociedade Deportiva de Cazadores “SOCIETARIO DE CAZADORES TERRA CHA” a Asemblea Xeral, a Xunta Directiva, e o Presidente.

**ARTIGO 10º.-** O Presidente da Xunta Directiva e, no seu defecto, aquel outros membros da mesma que determinen os Estatutos, ostentarán a representación legal da Sociedade, actuarán no seu nome, e estarán obrigados a executa-los acordos validamente adoptados pola Asemblea Xeral e Xunta Directiva.

**ARTIGO 11º.-** A Xunta Directiva, estará formada por un número de membros non inferior a cinco nin superior a quince, da que formarán parte ademais do Presidente, un Secretario, un Tesoureiro, e alomenos un Vocal por cada unha das seccións deportivas existentes. Tamén poderá formar parte da mesma un Vicepresidente que ostentará con carácter provisional a representación legal da sociedade, e exercerá as demais facultades do Presidente en substitución do mesmo, no seu caso, sempre que así o acorde a Xunta Directiva.

#### **1.- Corresponden á Xunta Directiva as seguintes atribucións:**

- 
- a) Mante-lo orde e a disciplina na Sociedade, así como nas competicións que organicen.
  - b) Convocar, por medio do seu Presidente, a Asemblea Xeral cando o estime necesario, cumprindo e acatando os acordos e decisións da mesma.
  - c) Sinala-las condicións e forma de admisión de novos socios, así como as cotas de ingreso e periódicas que deban de satisfacerse, debendo de ser ratificados ambos extremos pola Asemblea Xeral Extraordinaria.
  - d) Redactar ou reforma-los Regulamentos de Réxime Interior, fixando as normas de uso das instalacións e as taxas correspondentes, que en todo caso deberán de ser comunicadas á Asemblea Xeral e aprobados por ésta.
  - e) Nomea-las persoas que vaian dirixi-las distintas comisións que se creen, así como organiza-las actividades da Sociedade.
  - f) Formular Inventario e Balance Anual, así como redacta-la Memoria anual da Sociedade e, en xeral, aplicar tódalas medidas deportivas, económicas e administrativas precisas para o fomento e desenvolvemento do deporte dentro da Sociedade.

**ARTIGO 12º.-** A Xunta Directiva quedará validamente constituída en primeira convocatoria cando concorran a ela a maioría dos seus membros. En segunda convocatoria será suficiente a concorrencia de tres dos seus membros, en todo caso, do Presidente ou Directivo no que éste delegue. Os seus acordos adoptaranse por maioría simple dos membros presentes que se dará cando os votos afirmativos superen os negativos.

A Xunta Directiva será convocada polo seu Presidente con dous días de antelación, como mínimo, á data da celebración. Tamén poderá ser convocada a petición de tres ou máis dos seus membros.

**ARTIGO 13º.-** A Xunta Directiva quedará tamén validamente constituída cando estean presentes tódolos seus compoñentes, aínda que non mediara convocatoria previa.

**ARTIGO 14º.-** A elección do Presidente, e demais membros da Xunta Directiva efectuarase por períodos de catro anos, mediante sufraxio libre, directo, igual e secreto, por e entre os membros da Asemblea Xeral, conforme se establece no Anexo I dos presentes Estatutos. Tódolos cargos directivos son reelixibles.

**ARTIGO 15º.-** O Tesoureiro da Xunta Directiva será o depositario da Sociedade, asinará os recibos, autorizará os pagos e levará os Libros de Contabilidade.

Será obrigación do Tesoureiro, formalizar durante o primeiro trimestre de cada ano, un Balance de Situación e as Contas de Ingresos e Gastos, que se poñerán en coñecemento de tódolos asociados.

**ARTIGO 16º.-** O Secretario da Xunta Directiva coidará do arquivo da documentación, redactará cantos documentos afecten á marcha administrativa da Sociedade e levará o Libro de Rexistro de Asociados e Libro de Actas.

**ARTIGO 17º.-** O órgano supremo de goberno da Sociedade é a Asemblea Xeral, que estará integrada por tódolos socios de número con dereito a voto.

Cando o número de socios exceda de mil, a Asemblea Xeral, por razóns de aforo ou capacidade física do local, poderá decidi-la elección de Representantes:

- a) Elixiranse dez representantes por unidade de cen, mediante sufraxio libre, igual e secreto.
- b) Os socios candidatos a representantes deberán de presentarse con quince días de antelación á data da elección, debendo de consta-la súa aceptación.
- c) A elección dos socios representantes será bianual, debendo de intervir, polo tanto, en tódalas Asembleas Xerais, tanto ordinarias como extraordinarias, que se celebren no período para o que foron elixidos. Non poderán ser reelixidos para o seguinte período bianual, e a súa asistencia ás Asembleas Xerais é obrigatoria.

**ARTIGO 18º.-** As Asembleas Xerais, tanto ordinarias como extraordinarias, quedarán validamente constituídas en primeira convocatoria cando concorran a ela, presentes ou representados, a maioría dos socios. En segunda e última convocatoria (aproximadamente media hora máis tarde) quedará constituída calquera que sexa o número de membros presentes. Entre a data da convocatoria e o día sinalado para a celebración da Asemblea terán que mediar, como mínimo, dez días naturais, e non poderán transcorrer máis de vinte. Os seus acordos adoptaranse por maioría simple dos socios presentes que se dará cando os votos afirmativos superen os negativos.

**ARTIGO 19º.-** A Asemblea Xeral convocarase polo Presidente a iniciativa propia, ou a petición, por escrito, de alomenos o 25% dos socios de Número.

1. A Asemblea Xeral reunirse con carácter ordinario, previa convocatoria do Presidente ou Directivo no que delegue, alomenos unha vez ao ano, para trata-las seguintes cuestións:

- a) Aprobación, se procede, das Contas Anuais, Liquidación de Orzamentos, e Memoria explicativa do exercicio económico.
- b) Aprobación, se procede, dos Orzamentos para o exercicio seguinte.
- c) Memoria da actividade realizada.
- d) Proxectos e propostas do Presidente ou da Xunta Directiva.
- e) Proposicións que formulen os socios e que terán que ser asinadas, alomenos, polo 5% dos mesmos.
- f) Rogos e Preguntas.

2. Terá que celebrarse Asemblea Xeral extraordinaria para a modificación de Estatutos, elección do Presidente e Xunta Directiva, tomar cartos a préstamo, emisión de títulos representativos de débeda ou de parte alícuota patrimonial, enaxenación de bens inmoables e fixación das cotas dos socios, así como para



decidir votos de censura propostos en forma a calquera dos integrantes da Xunta Directiva ou a ésta no seu conxunto.

Os acordos da Asemblea Xeral e da Xunta Directiva, serán vinculantes e de obrigado cumprimento, e terán forza executiva a partir da data da súa adopción, sen prexuízo, no ámbito disciplinario, da posibilidade da súa impugnación ante os órganos competentes da Federación Galega de Caza e perante o Comité Galego de Xustiza Deportiva, conforme ao disposto na Lei 3/2012, do Deporte de Galicia.

Os conflitos internos que poidan xurdir no ámbito da Sociedade e que non estean previstos no ámbito do réxime disciplinario deportivo teñen natureza puramente asociativa e de ámbito civil, sen prexuízo da posibilidade de sometelos a arbitraje nos termos previstos no Título VII da Lei 3/2012 do Deporte de Galicia.



## CAPITULO IV

### RÉXIME DOCUMENTAL

**ARTIGO 20º.**- O réxime documental da Sociedade constará dos seguintes libros: Rexistro de Socios, de Actas e Contables.

**ARTIGO 21º.**- No Libro de Rexistro de Socios, deberán de consta-los nomes e apelidos dos socios de número, o nº do seu Documento Nacional de Identidade, e no seu caso, os cargos de representación, goberno e administración que exerzan na Sociedade. Tamén se especificarán as datas de altas e baixas, e as de toma de posesión e cese nos cargos aludidos. Os Libros de Socios deberán de estar dilixenciados pola Federación Galega de Caza ou polo Rexistro de Entidades Deportivas.

**ARTIGO 22º.**- Nos Libros de Actas, consignaranse as reunións que celebre a Asemblea Xeral e a Xunta Directiva, con expresión da data, asistentes, asuntos tratados e acordos adoptados. As actas deberán de estar asinadas, en todo caso, polo Presidente e polo Secretario. Os Libros deberán de estar dilixenciados pola Federación Galega de Caza ou polo Rexistro de Entidades Deportivas.

**ARTIGO 23º.**- Nos Libros de Contabilidade figurarán tanto o patrimonio como os dereitos e obrigacións, así como os ingresos e gastos da Sociedade, debendo de precisarse a procedencia daqueles e a inversión ou destino destes. Os Libros terán que estar dilixenciados pola Federación Galega de Caza ou polo Rexistro de Entidades Deportivas.

## CAPITULO V

### RÉXIME DISCIPLINARIO

**ARTIGO 24º.**- Os órganos e socios da Sociedade estarán sometidos ao Regulamento Disciplinario da Sociedade, aos Regulamentos Federativos, e ao disposto na Lei 3/2012 do Deporte de Galicia, e normativa do seu desenvolvemento.

**ARTIGO 25º.**- O Presidente e membros da Xunta Directiva, responderán fronte aos socios, á Sociedade ou terceiros, dos prexuízos que ocasionaren por culpa ou negligencia grave, de conformidade coa regulamentación propia da Sociedade e Ordenamento Xurídico vixente.

## CAPITULO VI



### RÉXIME ECONÓMICO-FINANCIERO E PATRIMONIAL

**ARTIGO 26º.-** A Sociedade Deportiva de Cazadores “**SOCIETARIO DE CAZADORES TERRA CHA**” someterase ao Réxime de Orzamentos e Patrimonio propio coas seguintes limitacións:

- a) Non poderá destina-los seus bens a fins industriais, comerciais, profesionais ou de servizo, nin exercer actividades de igual carácter co fin de repartir beneficios entre os seus socios. Os seus ingresos aplicaranse integramente á conservación e fomento do seu obxecto social.
- b) Poderá fomentar manifestacións de carácter físico-deportivo dirixidas ao público en xeral, aplicando os beneficios acadados ao desenvolvemento das actividades físicas e deportivas dos seus asociados.
- c) A Sociedade Deportiva de Cazadores “**SOCIETARIO DE CAZADORES TERRA CHA**” poderá gravar e enaxenar bens inmoables, tomar cartos a préstamo, emitir títulos transmisibles representativos de débeda ou parte alícuota patrimonial, sempre que cumpra cos seguintes requisitos:

1º. Que tales operacións sexan autorizadas por maioría de dous tercios dos socios presentes ou representados na Asemblea Xeral Extraordinaria.

2º. Que ditos actos non comprometan de xeito irreversible o patrimonio da Sociedade ou a actividade físico-deportiva que constituía o seu obxecto social. Para a adecuada xustificación deste extremo poderá esixirse, sempre que o soliciten como mínimo o cinco por cento dos socios de número, o oportuno dictame económico-actuarial.

3º. Cando se trate de tomar diñeiro a préstamo, gravar ou enaxenar bens inmoables en cuantía superior ao cincuenta por cento do orzamento anual, ou que represente unha porcentaxe igual ao valor do patrimonio, así como nos supostos de emisión de títulos, requirirase informe favorable da Federación Galega de Caza.

4º. Si se tratase de gravar ou enaxenar bens inmoables que foran financiados en todo ou parte, con Fondos Públicos da Comunidade Autónoma, será preceptiva a autorización do órgano competente da Xunta de Galicia en materia deportiva, previo informe da Federación Galega de Caza.

**ARTIGO 27º.-** A Sociedade Deportiva de Cazadores “**SOCIETARIO DE CAZADORES TERRA CHA**” poderá percibir libremente doazóns que non excedan da cantidade de 3.000 €uros. No suposto de doazóns que superen esta cantidade, precisarase autorización expresa do órgano competente da Xunta de Galicia en materia deportiva, previo informe da Federación Galega de Caza.

### ARTIGO 28º.-

1. A Sociedade Deportiva de Cazadores “**SOCIETARIO DE CAZADORES TERRA CHA**” poderá emitir títulos de débeda ou de parte alícuota patrimonial.
2. Os títulos serán nominativos.

### ARTIGO 29º.-

1. Os títulos inscribíranse nun Libro que levará ao efecto a Sociedade, no que se anotarán as sucesivas transferencias.
2. En tódolos títulos constará o valor nominal, a data de emisión e, no seu caso, o interese e prazo de amortización.

**ARTIGO 30º.-** Os títulos de débeda soamente poderán subscribilos os socios, e a súa posesión non conferirá dereito algún especial aos mesmos, agás a percepción dos intereses establecidos conforme á lexislación vixente.

**ARTIGO 31º.-** Os títulos de parte alícuota patrimonial serán asemade subscritos polos socios. En ningún caso estes títulos darán dereito á percepción de dividendos ou beneficios.

**ARTIGO 32º.-** Os títulos de débeda e parte alícuota patrimonial serán transferibles unicamente entre os que teñan a condición de socios.

## CAPITULO VII

### REFORMA DOS ESTATUTOS E DISOLUCIÓN DA SOCIEDADE



**ARTIGO 33º.-** Os presentes Estatutos soamente poderán ser modificados, reformados ou derogados por acordo da Asemblea Xeral Extraordinaria convocada ao efecto, mediante votacións favorables dos dous tercios dos socios de número asistentes.

**A reforma destes Estatutos seguirá, con respecto ao Rexistro de Entidades Deportivas, os mesmos trámites administrativos que para a súa aprobación.**

**ARTIGO 34º.-** A Sociedade Deportiva de Cazadores “**SOCIETARIO DE CAZADORES TERRA CHA**” extinguirase ou disolverase por:

- a) Acordo de dous tercios dos socios en Asemblea Xeral Extraordinaria, convocada a tal efecto.
- b) Por sentenza xudicial.
- c) Por outras causas legalmente determinadas.

En todo caso este acordo deberá ser notificado á Federación Galega de Caza e ó Rexistro de Entidades Deportivas.

**ARTIGO 35º.-** Disolta a Sociedade Deportiva de Cazadores “**SOCIETARIO DE CAZADORES TERRA CHA**” o remanente do seu patrimonio social, se o houbera, aplicarase a fins análogos de carácter deportivo, ben por acordo previo da Asemblea Xeral ou subsidiariamente pola Federación Galega de Caza e/ou órgano competente da Xunta de Galicia en materia deportiva.

En Cospeito, a 28 de Xaneiro de 2014.

O PRESIDENTE,

P.A. Vicepresidente

Asdo.: Juan José Fernández Veiga  
DNI. Nº 33.832.388-D

O SECRETARIO,

Asdo.: Carlos Anllo Canto  
DNI. Nº 33.829.867-H

# Anexo 1

## NORMATIVA ELECTORAL



O Presidente e a Xunta Directiva das Sociedades de Cazadores, elixiranse en **Asemblea Xeral Extraordinaria mediante sufraxio libre, igual, directo e secreto dos socios de número con dereito a voto, en candidaturas pechadas e completas** debendo de figurar nas mesmas a lista ou relación dos seus compoñentes coa designación do cargo que cadaun deles vaia ostentar, debendo estar formada por un número de membros non inferior a cinco nin superior a quince, ao fronte da cal estará o Presidente e da que formarán parte, ademais dun Secretario e un Tesoureiro, alomenos un Vocal por cada unha das seccións deportivas federadas.

### 1. SUPOSTOS NO QUE TERA LUGAR A CONVOCATORIA DE ELEIÇÕES:

As Sociedades de Cazadores procederán á convocatoria de eleccións a Presidente e Xunta Directiva, cando se produzan as seguintes causas:

- a) Por expiración do prazo de mandato da Xunta Directiva.
- b) Cando por dimisións, renuncias, morte ou incapacidade física, quedase a Xunta Directiva reducida ou modificada, de forma que non poida exercer debidamente as súas funcións.
- c) Por dimisión, renuncia ou incapacidade do Presidente que encabezara a candidatura.
- d) Por voto de censura ao Presidente ou á Xunta Directiva, aprobado en Asemblea Xeral Extraordinaria por maioría de dous tercios. A Asemblea será convocada ao efecto e a petición de, alomenos, o vintecinco por cento dos seus compoñentes con dereito a voto.

### 2. CONVOCATORIA

A convocatoria de eleccións a Presidente e Xunta Directiva acordarase en Asemblea Xeral de Socios, reunida con carácter extraordinario, notificando o acordo de convocatoria de eleccións á Federación Galega de Caza, co obxecto de que poida supervisar e resolver como órgano superior calquera incidencia relativa ao proceso electoral.

A estes efectos a Xunta Directiva mediante comunicación a tódolos integrantes da Asemblea Xeral, efectuada do xeito que se consiga a necesaria difusión e coñecemento, convocará a devandita Asemblea, especificándose na convocatoria como puntos da orde do día os seguintes:

#### 2.1.- ACORDO DE CONVOCATORIA DE ELEIÇÕES A PRESIDENTE E XUNTA DIRECTIVA.

#### 2.2.- CALENDARIO ELECTORAL, no que deberán de figura-las datas e prazos seguintes:

- a) Exposición do Censo Electoral.
- b) Reclamación ao Censo Electoral.
- c) Prazo de presentación de candidaturas.
- d) Prazo de estudio e aceptación das candidaturas.
- e) Prazo de divulgación de Candidaturas.
- f) Prazo de presentación de impugnacións contra as Candidaturas.
- g) Prazo para resolución de impugnacións contra as candidaturas.

- h) Data da votación (Asemblea Xeral Extraordinaria) con expresión do lugar de celebración e hora do seu comezo e remate -período durante o cal se pode exercer-lo voto-
- i) Prazo de presentación de impugnacións contra as votacións e escrutinio.
- j) Prazo de resolución de impugnacións e proclamación da candidatura gañadora.



### 2.3.- ELEIÇÃO DOS MEMBROS DA XUNTA ELECTORAL SOCIAL.

Sen prexuízo da existencia na Federación Galega de Caza dunha Xunta Electoral de Arbitraje, a Asemblea Xeral Extraordinaria da Sociedade deportiva de Cazadores ao acordar-la celebración de eleccións elixirá entre os asembleístas que non se presenten como candidatos a ningún dos cargos directivos, a seis socios que integrarán a Xunta Electoral Social, dos cales tres terán o carácter de titulares da devandita Xunta e os outros tres o de suplentes dos anteriores. Se algún deles, despois do seu nomeamento como membro da Xunta Electoral Social, e antes do prazo de presentación de candidaturas, decidira integrarse nalgunha das candidaturas, cesará automaticamente na súa condición de membro da devandita Xunta, sendo substituído polo primeiro dos substitutos elixidos.

A Xunta Electoral será a encargada de velar polo estricto cumprimento do calendario e normativa electoral, e decidir sobre calquera cuestión que afecte directamente á celebración das eleccións e resultados das mesmas, admitindo e proclamando as candidaturas, e resolvendo no seu caso tódalas reclamacións e impugnacións que se presenten contra o censo, prazos, candidaturas, candidatos, etc., así como as que se orixinen no decurso das votacións.

A Xunta Electoral Social deberá dar conta por escrito de tódolos seus acordos, actas, etc., á Federación Galega de Caza.

**2.4.- ELEIÇÃO E NOMEAMENTO DOS COMPOÑENTES DA MESA ELECTORAL.** Unha hora antes da prevista para o comezo da Asemblea Xeral Extraordinaria, na que terá lugar a votación para elixir-los cargos directivos da Sociedade deportiva de Cazadores, constituirase a Mesa Electoral, previamente elixida na Asemblea anterior na que se convocaron as eleccións.

#### 1. Composición da Mesa Electoral.

Na asemblea na que se acorde a convocatoria de eleccións elixiranse 3 persoas para integra-la Mesa Electoral: un Presidente (o de maior idade), un Secretario (o de menor idade) e un Vocal.

Poderán estar presentes, co obxecto de supervisa-lo desenvolvemento das eleccións, un Representante por cada unha das candidaturas que se presenten á elección. A devandita representación estará debidamente acreditada por quen encabece a candidatura.

#### 2. Funcións da Mesa Electoral.

- a) Comproba-la identidade dos votantes.
- b) Recolle-las papeletas de voto e depositalas na furna preparada ao efecto, que deberá de estar debidamente pechada e lacrada.
- c) Redactar, por medio do seu Secretario, a Acta correspondente, na que deberá de consta-lo número de electores, votos válidos emitidos, votos nulos, o resultado da votación e as incidencias ou reclamacións que se produzan.
- d) Remitir copia da acta, dentro das 24 horas seguintes á Xunta Electoral Social.

**2.5.- TRANSFORMACIÓN DA XUNTA DIRECTIVA EN XUNTA XESTORA.** Os membros da Xunta Directiva converteranse en Xunta Xestora na Asemblea Xeral Extraordinaria na que se convoquen as eleccións

### 3. CANDIDATOS.

Os assembleístas que desexen presenta-las súas candidaturas a Presidente e Xunta Directiva da Sociedade deportiva de Cazadores, deberán de reuni-los seguintes requisitos á data de finalización do prazo de presentación das candidaturas.



1. Ser español.
2. Maior de idade.
3. Atoparse en pleno uso dos dereitos civís e non estar suxeito a sanción disciplinaria deportiva que o inhabilite.
4. Ser socio da Sociedade cunha antigüidade mínima ininterrompida dun ano.
5. Estar en posesión da licenza federativa de caza en vigor, que deberá manter durante todo o mandato.
6. Presenta-la candidatura con escrito de aceptación de tódolos candidatos integrados na mesma.

As candidaturas presentaranse, dentro do prazo establecido no Calendario Electoral, ante a Xunta Electoral Social en listas pechadas e completas, especificando os cargos para os que se presente cada candidato.

### 4. ELECTORES.

Nas eleccións da Xunta Directiva da Sociedade deportiva de Cazadores teñen dereito a voto os socios de número, maiores de 18 anos que estean ao corrente das súas obrigacións sociais e dispoñan de Licenza Federativa de Caza en vigor no momento da celebración das votacións, salvo acordo contrario da asemblea xeral.

### 5. VOTACIÓNS.

- a) No caso de existir unha soa candidatura que reúna todos e cadaún dos requisitos establecidos, non procederá a constitución da Asemblea e os seus compoñentes serán proclamados pola Xunta Electoral como membros da nova Xunta Directiva.
- b) Se foran máis dunha ás candidaturas válidas, celebraranse as eleccións na forma prevista.
- c) As votacións efectuaranse mediante sufraxio persoal, directo e segredo dos socios con dereito a voto.
- d) As votacións realizaranse en papeletas de tamaño único facilitadas pola Xunta Electoral Social.
- e) Sendo as candidaturas pechadas e completas, os electores deberán de elixir calquera delas na súa totalidade, anulándose os votos que non se axusten a esta determinación.
- f) O voto é persoal e intransferible, non permitíndose o voto por correo.
- g) Os integrantes da Xunta Electoral Social e da Mesa Electoral, exercerán o seu dereito a voto, si o tiveran, en último lugar.
- h) Rematada a votación, a Mesa procederá ao reconto de votos en presenza dos representantes de cada unha das candidaturas que fixeron uso deste dereito.

O Presidente da Mesa dará lectura ao resultado da votación, resultando elixida a candidatura que acade maior número de votos, procedéndose pola Xunta Electoral á proclamación dos elixidos. En caso de empate na votación, a Xunta Electoral Social convocará unha nova votación sinalando lugar, día e hora, entre as candidaturas que produciron o empate.

- i) Do desenvolvemento da Asemblea levantarase Acta polo Secretario da Mesa Electoral na que se recollerán as incidencias que se produzan, o desenrolo da votación e o resultado da mesma con expresión de tódolos votos emitidos (válidos, nulos e en branco).

A Acta asinarana tódolos compoñentes da Mesa Electoral e os representantes dos candidatos que interviren no escrutinio. Copia da acta enviarase á Federación Galega de Caza.

## 6. PROCLAMACIÓN.

Rematada-las votacións e, no seu caso, os prazos de impugnacións e resolución das mesmas anteditos, expoñerase na sede da Sociedade a proclamación da candidatura que resultase gañadora.

**A elección da nova Xunta Directiva deberá ser notificada ao Rexistro de Entidades Deportivas e á Federación Galega de Caza.**

A Federación Galega de Caza, á vista de toda a documentación recibida da Xunta Electoral Social, procederá a expedi-la oportuna credencial ao novo Presidente e Xunta Directiva da Sociedade.

## 7. DURACIÓN E EXERCICIO DO MANDATO.

A duración do mandato da Xunta Directiva electa será de catro anos dende a súa proclamación, de non producirse ningún dos supostos previstos no punto 1 da presente Normativa Electoral, podendo presentarse tódolos membros á súa reelección, conxuntamente ou por separado noutras candidaturas.

Durante o mandato da Xunta Directiva, o Presidente, en caso de vacantes por dimisións sempre que non entren en contradicción co punto 1.B anterior, poderá nomear substitutos que deberán de ser ratificados pola Asemblea Xeral, podéndose ampliar ou diminuí-lo número dos seus membros previa aprobación da Asemblea Xeral.

En todo o non previsto na presente Normativa, estarase ó disposto na Lei 3/2012, do Deporte de Galicia, Normas de Desenrolo, e Normativa da Federación Galega de Caza.

En Cospeito, a 28 de Xaneiro de 2014.



O PRESIDENTE,

O SECRETARIO,

P.A. Vicepresidente

Asdo.: Juan José Fernández Veiga  
DNI. N° 33.832.388-D


Asdo.: Carlos Anllo Canto  
DNI. N° 33.829.867-H

DILIXENCIA: Esténdoa para facer constar que os presentes estatutos da Sociedade Deportiva de Cazadores SOCIETARIO TERRA CHÁ

afiliada co N.º 565

foron aprobados de conformidade co disposto nos Estatutos da Federación Galega de Caza.

Santiago, 25 de febreiro de 2014



DILIXENCIA: Exténdoa para facer constar que os presentes Estatutos do **SOCIETARIO DE CAZADORES TERRA CHÁ**, foron ratificados e inscritos co nº **C-08072**, o **día 4 de marzo de 2004**, no Rexistro de Entidades Deportivas de Galicia, de conformidade e sendo a súa aplicación o disposto na Lei 3/2012, de 2 de abril, do deporte de Galicia (D.O.G. 13-04-2012).

25 de febreiro de 2014  
O FUNCIONARIO



Asdo.: Luis Gregorio Ramos Misioné